

Стихиры Рождества Христова на «Господи, воззвах», глас 2:

Да будут уши Твои // внимлюще гласу моления моего.

Господу Иисусу рождшуся от Святыя Девы, / просветишася
всяческая: / пастырем бо свирающим и волхвом
поклоняющимся, / Ангелом воспевающим, Ирод мяташеся, /
яко Бог во плоти явися, // Спас душ наших.

**Аще беззакония назриши, Господи, Господи, кто постоит?
/ /Яко у Тебе очищение есть.**

Царство Твое, Христе Боже, Царство всех веков, / и
Владычество Твое во всяком роде и роде, / воплотивыйся от
Духа Святаго / и от Приснодевы Марии вочеловечивыйся, / свет
нам возсия, Христе Боже, Твое пришествие; / Свет от Света,
Отчее сияние, / всю тварь просветил еси, всякое дыхание
хвалит Тя. / Образ славы Отчия, Сый, и прежде Сый, // и
возсиявый от Девы, Боже, помилуй нас.

**Имене ради Твоего потерпех Тя, Господи, потерпе душа
моя в слово Твое, // упова душа моя на Господа.**

Что Тебе принесем, Христе, / яко явился еси на земли / яко
Человек нас ради? / Каяждо бо от Тебе бывших тварей /
благодарение Тебе приносит: / Ангели – пение; небеса – звезду; /
волсви – дары; пастырие чудо; / земля – вертеп; пустыня – ясли; /
мы же – Матерь Деву. // Иже прежде век, Боже, помилуй нас.

Слава, и ныне, глас тойже (2 - й):

Августу единоначальствующу на земли, / многоначалие
человеков преста; / и Тебе вочеловечшуся от Чистыя, /
многобожие идолов упразднися, / под едином царством
мирским гради быша, / и во Едино Владычество Божества
языцы вероваша. / Написашеся людие повелением кесаревым, /
написахомся, вернии, Именем Божества, / Тебе, вочеловечшагося
Бога нашего. // Велия Твоя милость, Господи, слава Тебе.